

Այսօր տեղի է ունեցել Հայաստանի Հանրապետության կառավարության բարեգործական ծրագրերի համակարգման հանձնաժողովի հերթական նիստը, որը վարել է հանձնաժողովի նախագահ Սիմոն Տեր-Սիմոնյանը:

Հանձնաժողովը քննարկել է 16 բարեգործական ծրագիր:

Մասնավորապես, քննարկվել և հաստատվել են՝

Մայր Աթոռ Սուրբ Էջմիածնի կողմից իրականացվող «Գևորգյան հոգևոր ճեմարանի և Սևանի Վազգենյան դպրանոցի սաների համազգեստի պատրաստում», «Միաբանական շենքի աստիճանավանդակի կոփածո բազրիքների պատրաստում և տեղադրում» և «Գևորգյան հոգևոր ճեմարանի և Վազգենյան դպրանոցի դասախոսական կազմի տեղափոխության պայմանների բարելավում» ծրագրերը:

Հայ կաթողիկե եկեղեցու Հայաստանի համայնքի կողմից իրականացվող «Լոռու մարզի, Տաշիր քաղաքի «Սուրբ Աստվածածին» հայ կաթողիկե եկեղեցու վերանորոգում» ծրագիրը:

Հայկական բարեգործական ընդհանուր միության Հայաստանի ներկայացուցչության կողմից իրականացվող «Գյումրիի մտավոր թերզարգացում ունեցող երեխաների թիվ 3 հատուկ օժանդակ դպրոցին աջակցություն» ծրագիրը:

«Վորլդ Վիժն Ինթերնեյշնլ» միջազգային բարեգործական կազմակերպության հայաստանյան մասնաճյուղի կողմից իրականացվող «Խաղասարքերի տեղադրում Հայաստանի Հանրապետության Գեղարքունիքի մարզի Սուրբ և Շատվան համայնքներում», «Հայաստանի Հանրապետության Տավուշի մարզի Լուսածոր և Սարիգյուղ համայնքների ոռոգման ու Սևքար և Տավուշ համայնքների խմելու ջրի ջրագծերի վերանորոգում», «Ամառային ճամբար Հայաստանի Հանրապետության Շիրակի մարզի Գյումրի քաղաքի և Մարմաշեն ու Հովունի գյուղերի 600 երեխաների համար» ծրագրերը:

«Հայկական Կարիտաս» բարեսիրական հասարակական կազմակերպության կողմից իրականացվող «Տնային խնամք ծերերի համար», «Հայաստանի Հանրապետության Գեղարքունիքի մարզի Չկալովկա համայնքի ջրամատակարարման ներքին ցանցի վերանորոգում» և «Հայաստանի Հանրապետության Շիրակի մարզի Յողամարգ համայնքի ջրամատակարարում» ծրագրերը:

Հայկական Կարմիր խաչի ընկերության կողմից իրականացվող «Տուբերկուլյոզով հիվանդներին սոցիալական աջակցության տրամադրում» ծրագիրը:

Ամերիկայի հայ օգնության ֆոնդի Հայաստանի մասնաճյուղի կողմից իրականացվող «Գյումրի քաղաքի Շիշյանի անվան «Օկտետ» թիվ 6 երաժշտական դպրոցի շենքի նախագծում» ծրագիրը:

«Կամրջակ» սոցիալ-բարեգործական հասարակական կազմակերպության կողմից իրականացվող «Լոռու մարզի Սարամեջ համայնքի ջրագծի կառուցում» ծրագիրը:

«Գաֆէսճեան Թանգարան» հիմնադրամի կողմից իրականացվող «Երեխաների պաշտպանության միջազգային օր» ծրագիրը:

Հայաստանի Հանրապետության առողջապահության նախարարության «Տուբերկուլյոզի դեմ պայքարի ազգային գրասենյակ» ՊՈԱԿ-ի կողմից իրականացվող «Տուբերկուլյազի դեմ պայքարի ազգային ծրագրի աջակցություն» ենթադրամաշնորհային ծրագիրը:

Նիստում քննարկվել և հաստատվել են նաև նախկինում հաստատված ծրագրերի շրջանակներում իրականացվող հարակից գործարքներ և տարբեր կազմակերպությունների հասցեներով ստացված բարեգործական բեռների ներմուծման ծրագրեր: